

NOTA DE PRENSA

RTPA CUMPLE 20 AÑOS CUNTANDO ASTURIES CON UNA PROGRAMACIÓN ESPECIAL QU'EMPIEZA'L 9 DE XUNU

- *Los informativos van emitir les sos ediciones dende distintos escenarios d'Asturies y Conexión Asturias va estrenar la sección «Punto Conexión», un percorriú pela memoria compartida de la cadena y la so audiencia*

Xixón, 8 de xunu del 2026

Mañana, 9 de xunu, cúmplense venti años del empiezu de les emisiones regulares de la Televisión del Principáu d'Asturies (TPA). Dos décadas nes que RTPA acompañó a la ciudadanía asturiana al traviés de la información, el deporte, los eventos, la cultura, l'entretenimientu, los acontecimientos y la cotidianidá del día a día n'Asturies.

Pa conmemorar esti aniversariu, RTPA preparó una programación especial qu'empieza mañana martes y que, a lo llargo de los meses próximos, va poner el focu nes persones, los sitios y les histories que formaron parte d'estos venti años de serviciu públicu de comunicación audiovisual.

Los informativos recuerden el martes 9 de xunu la so estrena va 20 años

El 9 de xunu del 2006 empezaron les emisiones regulares de TPA, col primer informativu diariu de la cadena, *TPA Noticias*.

Por esi motivu, esti martes los informativos de RTPA van salir de los sos estudios de la Universidá Llaboral pa emitise dende distintos escenarios emblemáticos d'Asturies. L'informativu mañaneru va realizase dende l'**Acuariu de Xixón**, que tamién abrió les sos

puertes el 9 de xunu del 2006. A mediudía, *TPA Noticias 1.ª edición* va emitise dende la **fábrica d'armes d'Uviéu**, un edificiu que cambió d'usu nos venti años últimos. A les 20:30 hores, la segunda edición va tar nel **Centru Niemeyer**, un allugamientu que modificó'l paisaxe urbanu d'Avilés y convirtióse en polu d'atracción de la ciudá.

A lo llargo del día, los informativos van recordar delles de les noticies más destacaes d'estes dos décadas, van entrevistar a persones que foron protagonistas de l'actualidá y van realizar conexones en directo dende dellos llugares que yá apaecieron na primer edición de *TPA Noticias*, emitida'l vienres 9 de xunu del 2006.

Conexión Asturias estrena «Punto Conexión»

Dientro de la programación especial del 20 aniversariu, *Conexión Asturias* va estrenar «Punto Conexión», una sección nueva que va percorrer la memoria colectiva d'Asturies al traviés de delles de les histories que formaron parte de la trayectoria de la televisión autonómica nes dos décadas últimes.

La sección va visitar dellos conceyos pa realcontrase con vecinos, asociaciones, clubes deportivos y protagonistas anónimos qu'un día compartieron les sos histories énte les cámares de TPA y dieron sentíu a un lema que sigue d'afechu vixente: «Cuando nos ves, te ves».

La exa central d'esti espaciu nuevu va ser un sofá instaláu en sitios emblemáticos d'Asturies. Places, puertos, miradores y otros rincones singulares van convertise n'escenarios pa compartir acordances, recuperar imáxenes d'archivu y descubrir cómo evolucionaron les vides de los que protagonizaron aquellos reportaxes, amás de los proyectos y los llugares que formaron parte d'ellos.

Les primeres entregues van grabase nel mes de xunu en Sariegu, A Veiga, Mieres y Cuideiru.

RTPA estrena imaxe conmemorativa pa festexar los sos venti años de serviciu públicu

Coincidiendo col so 20 aniversariu, RTPA incorpora a tolos sos programes una imaxe conmemorativa especial. El distintivu «20 años contigo» acompaña les emisiones de la cadena y reflexa dos décadas d'información, entretenimientu y conexón con Asturias.

La propuesta gráfica nueva actualiza los principales códigos visuales de RTPA pa celebrar venti años d' historia compartida cola audiencia. El logotipu asitia'l númberu 20 como exa central y integra elementos reconocibles de la marca nuna composición que combina trayectoria, cercanía y vocación de serviciu públicu.

Anguaño, RTPA desenvuelve conteníos pa televisión, radio, web y plataformes dixitales, calteniendo la mesma vocación cola qu'empezó les sos emisiones: informar, divulgar, acompañar y conectar Asturias.

Nestes dos décadas, la cadena foi testigu y narró los principales acontecimientos d'Asturies, averando l'actualidá de tolos conceyos, siguiendo la evolución de la sociedá asturiana, la crecedera de la so población hasta los 1.024.120 habitantes y conectando colos asturianos y asturianas que viven fuera de la so tierra. Contribuyendo a caltener y divulgar la so identidá cultural, llingüística, y en definitiva, el patrimoniu del Principáu d'Asturies.

Venti años depués, el compromisu sigue siendo'l mesmu: ufiertar información cercana, rigurosa y de calidá, reflexar la diversidá del territoriu y fortalecer el vínculu ente'l serviciu públicu de comunicación audiovisual y la ciudadanía a la que sirve.

Venti años cuntando Asturias. Venti años xunto a quien la faen posible.